

आकाशवाणी जयपुर-अजमेर

प्रादेशिक समाचार

- प्रदेश मांय केई ठोड़ां भारी बारिश—बंधा ऊं बत्तो पाणी निकाळ्यो जा रह्यो हैं
- चिकित्सा मंत्री गजेन्द्र सिंह खींवसर मौसमी बीमारियां ऊं बचाव सारू अहलकारां ने पुख्ता बन्दोबस्त करण रा हुकम दीनां
- प्रधानमंत्री नरेन्द्र मोदी कह्यो—वां री पांच देशां री यात्रा ऊं ग्लोबल साउथ मांय भारत रा दोस्ताना रिश्ता मजबूत व्हेलां
- जयपुर—बांदीकुई एक्सप्रेस वे तैयार—दस दिन रा ट्रायल पाछे जनता सारू खोल्यो जावेलं

000

प्रदेश मांय केई ठोड़ां जोरदार मेह बरस्यो हैं टोंक जिला रा लांबा हरिसिंह मांय साढे 23 सेंटीमीटर जदके झालावाड जिला रा खानपुर मांय करीब 20 सेंटीमीटर बरसात व्हीं अजमेर, भीलवाड़ा, कोटा अर बारां मांय ई कटे—कटे तेज बारिश रा समाचार हैं कोटा हलका रा केई कस्बां मांय व्ही जोरदार बिरखा पाछे नीचली बस्तियां मांय पाणी भर ग्यो हैं जोरदार बारिश पाछे केई ठोड़ां जिन्दगी माथे असर पड़्यो हैं अर गांवाई हलकां रो खास गेलां ऊं सम्पर्क कट ग्यो हैं हाड़ौती हलका मांय बरस रह्या जोरदार मेह पाछे बंधा मांय भारी तादाद मांय आ रह्या पाणी ने ध्यान राखता थकां बत्तो पाणी निकाळ्यो जा रह्यो हैं, जिण ने ध्यान राखता थकां कोटा ऊं धौलपुर ताई अलर्ट जारी करी ज्यो हैं कोटा बैराज, राणा प्रताप सागर अर भीम सागर बंधा ऊं पाणी छोड़्यो जा रह्यो हैं चित्तौड़गढ़ मांय आज दोपहरां ताई रुक—रुक र बिरखा व्हेती रहीं म्हाणा खबरनवीस बतायो के जिला मांय व्हे रही झमाझम बिरखा पाछे राणा प्रताप सागर बंधा रा दरूजा खोल दिया ज्या है अर हलका रा केई छोटा—मोटा बंधा अर तळाव लबालब भर ग्या हैं

मौसम विभाग आज 11 जिलां मांय कटे—कटे भारी बारिश रो अर्रेंज अलर्ट जारी कीनो हैं

000

चिकित्सा मंत्री गजेन्द्र सिंह खींवसर जनता ने मौसमी बीमारियां ऊं बचावण सारू पुख्ता प्रबंध करण रा हुकम दीना हैं श्री खींवसर आज वीडियो कॉन्फ्रेंस रे मार्फत मीटिंग कर र सगळा जिलां मांय चौमासा री बिरखा बीचे मौसमी बीमारियां रे कारण उपजा हालात री जाणकारी लेनीं चिकित्सा मंत्री आं री रोकथाम, जांच अर ईलाज सारू जरूरी व्यवस्थावां करण बाबत् कह्यो चिकित्सा मंत्री अस्पतालां मांय दवाइयां री उपलब्धता अर साज—ओ—सामान ई चालू हालत मांय राखण बाबत् कह्यो खींवसर नुवा अस्पतालां सारू जमीं आवंटन री कार्यवाही माथे खास ध्यान देवण बाबत् ई कह्यो वे टी.बी. मुक्त ग्राम पंचायत अभियान रा तैत कर्या जा रह्या कामां रो जायजो लेता थकां टी.बी. रा मरीजां री पिछाण कर र जांच करण रा हुकम ई दीनां

000

प्रदेश मांय पात्र लोगां ने जनता रा भला सारू चलायी जा रही योजनावां रो फायदो दिरावण सारू चलाया जा रह्या अंत्योदय संबल पखवाड़ा रा तैत शिविर लगाया जा रह्या हैं 24 जून ऊं सरू व्हा आं शिविरां मांय पीवण रा पाणी, स्वास्थ्य, राजस्व अर पेंशन समेत न्यारा—न्यारा कामां ने मौके ई निपटारा जा रह्या हैं मुख्यमंत्री भजनलाल शर्मा रो काल सवाईमाधोपुर जिला रा बालेर मांय लगाया जावण वाळा शिविरां रो दौरो करण रो कार्यक्रम हैं श्री शर्मा रो आठ जुलाई ताई चूरू, बीकानेर, जोधपुर, कोटपूतली—बहरोड़ अर खैरथल—तिजारा रो दौरो कर र वटे लगाया जावण वाळा शिविरां रो जायजो लेवण रो कार्यक्रम हैं

000

कृषि मंत्री किरोड़ीलाल मीणा आज सिरोही जिला रा स्वरूपगंज मांय नकली बायो डीजल रो कारखानो पकड़्यो कार्यवाही रे दौरान मोटी तादाद मांय नकली बायो डीजल पकड़ी ज्यो ई कारखाना मांय टैक्स चोरी ऊं जुड़ी गड़बड़ियां ई सामी आई हैं कृषि मंत्री कारखाना परिसर रो दौरो कर र अहलकारां ने जांच रा हुकम दीनां

ध्यानजोग है के श्री मीणा री अगुवाई मांय लारला कुछ दिनां ऊं न्यारी—न्यारी ठोड़ां मिलावटी खाद बणावण अर अमानक बीज बेचण वाळां रे खिलाफ कार्यवाही करी जा रही हैं दूजी कानी प्रदेश कांग्रेस अध्यक्ष गोविंद सिंह डोटासरा राज्य सरकार ऊं मिलावटी खाद रा मामलां री जांच करण री मांग कीनी हैं

000

प्रधानमंत्री नरेन्द्र मोदी आज संवारे पांच देशां रा दौरा सारू रवाना व्हां श्री मोदी घाना, त्रिनिडाड अर टोबैगो, अर्जेंटीना, ब्राजील अर नामीबिया रा आठ दिन रा दौरा रा पहला दौर मांय आज घाना री राजधानी अकरा पूग रह्या हैं लारला तीस साल मांय भारत रा किण ई प्रधानमंत्री रो अफ्रीकी देश घाना रो ओ पहलो दौरो हैं दौरा सारू रवाना व्हेवण ऊं पैली श्री मोदी कह्यो के ई दौरा ऊं दुनिया रा लंकाऊ हलका सागे भारत रा दोस्ताना रिश्ता मजबूत बणेलां

000

राज्यां अर केंद्र रा राज वाळा प्रदेशां रा शहरी स्थानीय निकायां रा अध्यक्षां रो राष्ट्रीय सम्मेलन काल हरियाणा रा मानेसर मांय सरू सरू व्हेलां लोकसभा अध्यक्ष ओम बिरला रो दो दिन रा ई सम्मेलन रो उद्घाटन करण रो कार्यक्रम हैं सम्मेलन मांय **संवैधानिक लोकतंत्र को मजबूत बनाने और राष्ट्र निर्माण में शहरी स्थानीय निकायों की भूमिका** मुद्दा माथे पर चर्चा करी जावेलं

000

विधानसभा अध्यक्ष वासुदेव देवनानी आज अजमेर मांय वर्धमान महावीर खुला विश्वविद्यालय रा महर्षि दयानन्द सरस्वती विश्वविद्यालय परिसर मांय बणाया जावण वाळा क्षेत्रीय केन्द्र री नाँव रखीं ई मौके राखी ज्या कार्यक्रम मांय वे नौकरी-धंधा लायक बणावण वाळा कोर्स चलावण माथे जोर दीनों श्री देवनानी ई सागे ई फ्रेंच अर जर्मन भाषा रा कोर्स सुरू करण री जरूरत ई बताई वे हाल ही मांय फ्रांस अर जर्मनी रा दौरा रो जिकर करता थकां कह्यो के वटे भारत रा लोगां सारु काम-धंधा रा खूब मौका है अर ऐडा कोर्स वटे नौकरी-धंधा हासिल करण मांय मददगार साबित व्हेलां विश्वविद्यालय रा कुलगुरु प्रोफेसर कैलाश सोडाणी बतायो के विद्यार्थियां रो झुकाव ओपन शिक्षा ओडी बध रह्यो हैं विधानसभा अध्यक्ष कह्यो के वी.एम.ओ.यू. दूरस्थ बालिका शिक्षा योजना रा तैत मुफ्त भणार्ई-लिखाई रो सुबीतो ई मुहैया करावे हैं वे बतायो के लारला साल 39 हजार महिलावां इण रो फायदो उठायों

000

पी.टी.ई.टी. इम्तिहान रो नतीजो आज जारी कर दियो ज्यो हैं उपमुख्यमंत्री अर उच्च शिक्षा मंत्री डॉ. प्रेमचंद बैरवा जयपुर मांय वर्धमान महावीर खुला विश्वविद्यालय रा क्षेत्रीय केन्द्र ऊं नतीजो जारी कीनों वीएमओयू रा कुलगुरु बतायो के दो साल रा बी. एड कोर्स री प्रवेश परीक्षा मांय जयपुर जिला रा नितेश गडवाल अव्वल रह्यां ईटीग्रेटेड बीए, बीएड कोर्स मांय बालोतरा जिला रा जगदीश चौधरी अर बीएससी बीएड कोर्स मांय बाड़मेर रा सुमित अव्वल रह्यां प्रवेश परीक्षा व्हेवण रा 16 दिन मांय ई नतीजो जारी कर दियो ज्यों

000

जयपुर-बांदीकुई एक्सप्रेस-वे माथे जांच करण ऊं जुड़ी आवण-जावण आज सुरू व्हे गयीं जयपुर ऊं दौसा जिला रा बांदीकुई ने जोड़बा वाळा 66 किलोमीटर लम्बा ई फोरलेन एक्सप्रेस-वे माथे टोल ऊं जुड़ी तैयारियां ई पूरी कर लीरीजी हैं करीब 66 किलोमीटर लम्बो जयपुर-बांदीकुई एक्सप्रेस वे बण जावण ऊं जयपुर-दिल्ली बीचे सफर रो बगत लगभग 45 मिनट कम व्हे जावेलां दो हजार करोड़ रुपया रा खर्च ऊं बण्या ई एक्सप्रेस-वे माथे दस दिन तांई ट्रायल करी जावेलां ई पाछे जनता सारु खोल र ई माथे टोल लेवणो सुरू कर दियो जावेलां ओ दिल्ली-वडोदरा एक्सप्रेस-वे अर जयपुर बीचे सीधो सम्पर्क बणावे हैं

000

भ्रष्टाचार निरोधक ब्यूरो नागौर नगर परिषद रा सहायक नगर नियोजक ने चार लाख रुपया री घूस लेता रंग्या हाथां पकड़ लीनों एसीबी री अतिरिक्त पुलिस महानिदेशक सिमता श्रीवास्तव बतायो के आरोपित रे खिलाफ मामलो दर्ज कर र वां ऊं पूछताछ करी जा रही हैं वे बतायो के आरोपित अहलकार परिवादी ऊं वेयर हाउस अर कोल्ड स्टोरेज मांय तकनीकी रपट सकारात्मक बणावण रे बदले आ रकम मांगी हीं

000

नागौर जिला रा खीवसर कने आकला गांव रा तळाव मांय डूब जावण रे कारण दो टाबरां री मौत व्हे गयीं एक ही पिरवार रा अ बच्चा बकरियां ने पाणी पावण सारु तळाव कने गया हां ई दौरान पग रपट जावण रे कारण दोन्यू बाळक तळाव मांय पड़ र डूब ग्यां करीब चार घंटे पाछे बचाव दल लाशां बाहर निकालीं

000

चूरू मांय जिला प्रशासन बिरखा रो पाणी भेलो करण सारु रिचार्ज कुंआ बणावण री पहल कीनी हैं म्हाणा खबरनवीस बतायो के शहर मांय सात खास ठोडां अ कुंआ बणायी ज्या हैं पैली वटे भेलो व्हेवण वाळो बिरखा रो पाणी छंट र बेकार व्हे जातो हों

.....
000